

Inatsisartut suleriaasianni § 33, imm. 6, nr. 4 naapertorlugu matumuuna Naalakkersuisut alajangiiffigisassatut siunnersuut saqqummiuppaat:

Uunga siunnersuut: Appariilertarneq appariikkunnaartarnerlu pillugit inatsisip ilaata, appariinnermi inatsisitigut kingunerisassat pillugit inatsisip aamma eqqartuussiveqarneq pillugu Inatsisip aamma Nalunaarsukkamik inooqatigiinneq pillugu Inatsisip Kalaallit Nunaannut atortuulersinneqarnissaanik peqqussutip Kalaallit Nunaanni Namminersorlutik Oqartussanit akuersaarneqarnissaa pillugu Inatsisartut aalajangiiffigisassaat (Assigiimmik suaassusillit akornanni katissimanerup kingunerisaanik appariittut nalunaarsorsimaneq pillugu inatsisikkut peqqussutip atorunnaarsinnera)

(Naalakkersuisut siulittaasuat)

Tunngavilersuut

Aalajangiinissamut siunneruut tassaavoq inuit marluk assigiimmik suaassuseqatigiittut appariilernissaminnut periarfissaqalernerisigut nalunaarsukkamik inooqatigiinnermut naalagaaffiup inatsisaata atorunnaarsinneqarneranut Kalaallit Nunaanni Namminersorlutik Oqartussat oqaaseqataat.

Inatsisartut ukiakkut 2010-mi (UKA2010/70) aalajangernerisa allannguut malitsigaa, taamani Inatsisartut tamarmiusut aalajangerpaat inuit marluk assigiimmik suaassuseqatigiittut appariilernissaminnut periarfissaqalernissaat Kalaallit Nunaanni kissaatigineqartoq. Aalajangerneq taanna tunngavigalugu taamanikkut Naalakkersuisut naalagaaffimmi oqartussanut attaveqarput pineqartumi maleruagassat atuuttut allanngortinneqarnissaat kissaatigalugu.

Danmarkimi maleruagassat kingusinnerusukkut allanngortinneqarput, tamatumalu aqutissiuuppa pineqartumi maleruagassat Kalaallit Nunaanni allanngortinneqarsinnaalernerat.

Peqqussutip imarisaa

Inuit marluk assigiissumik suaassuseqartut assigiinngitsumik suaassuseqartunut naligiissitaallutik 1. april 2015-miit atuutilersumik appariilersinneqartalernissaat allannguutip ammaatissavaa.

Inuit marluk suaassuseqatigiittut akornanni appariinneq pillugu Danmarkimi maleruagassat qulaani taaneqartutut inatsit nr. 532, 12. juni 2012-meersumi nassaarineqarsinnaapput. Inatsimmi tassani allanngortitsinnermi appariinneq pillugu inatsimmi § 1 nutaaq ikkunneqarpoq, tassani aalajangersarneqarluni inuit marluk assigiinngitsunik suaassuseqartut aamma inuit marluk assigiimmik suaassuseqartut akornanni appariinnut inatsit atuuttoq. Inatsisit sunniutaat pillugu inatsimmi aalajangersakkamik ikkussisoqarpoq, tamatuma kingorna danskit inatsisaanni aalajangersakkat, appariinni aappaasup taassuma suaassusianik aalajangerneqartoq pillugu immikkut maleruagassanik imaqartoq, inuit marluk assigiimmik suaassusillit akornanni appariinni atorneqassanngilaq. Aammattaaq nunani tamalaani isumaqatigiissutini aalajangersakkat inuit marluk assigiimmik suaassusillit akornanni aappaariinni atunngillat, isumaqatigiissummi peqataasut tamatumunnga akuersisimangippata.

Peqqussutissamut missingiutikkut nalunaarsukkamik inooqatigiinneq pillugu peqqussut atorunnaarsinneqarpoq, taannali ulloq 1. april 2015 sioqqullugu inooqatigiittut nalunaarsorsimasunut suli atuutissalluni.

Nalunaarsukkamik inooqatigiinneq pillugu inatsit malillugu Kalaallit Nunaanni inooqatigiilersimasut aappariit kissaateqarnerisigut aappariinnertik kommunalbestyrelsimi siulittaasumit imaluunniit Naalagaaffiup sinnisuanit allanngortissinnaavaat, tak. aappariinneq pillugu peqqussummi § 16, imm. 1.

Peqqussutissamut missingiut eqqikkagaq ilanngunneqartoq innersuussutigineqarpoq

Aningaasaqarnikkut sunniutai

Soqanngilaq

Tusarniaaneq

Peqqussutissamut siunnersuut naalagaaffiup oqartussaasuinit tusarniaassutigineqarpoq.